

2016-imi aasartinnagu Telepost A/S-imi piginnittuunermut periusissiamik ersarissumik Naalakkersuisut suliaqarnissaannik Inatsisartunut aalajangiiffigisassatut siunnersuut. Piginnittuunermut periusissiami tele-p iluani namminersortunngorsaanissami pilersaarutit naatsorsuutiginninnerillu ersarissumik allanneqarsimassapput. Tamatuma saniatigut ingerlassanut Telepost A/S-mut toqqaannartumik imminut akilersinnaanngitsunut Telepost A/S-ip aningaasaliinissaanut qanoq naatsorsuutiginninnerit ersarissarneqarsimassapput, taakkunungaluk søkabel-ip tallineqarnissaanut radiokæde-llu pitsanngorsarneqarnissaanut pisat ilaapput.

(Inatsisartunut ilaasortaq Kalistat Lund, Inuit Ataqtigiit)

Akissuteqaat

(Naalakkersuisut Siulittaasuat)

1. Siullermeerneqarnera

Aallaqqaasiullugu Naalakkersuisut aalajangiiffigisassatut siunnersuut saqqummiunneqartoq qujassutigaa, nalunaarasuartaateqarnermut tunngasuni uagut naalakkersuinikkut anguniakkat-ta sulissutigerusutattalu oqallisiginissaannut periarfissiilluarmat.

Siunnersuuteqartup kissaatigaa Naalakkersuisut 2016-imi aasartinnagu Tele Greenland A/S-imut ersarissunik piginnittuunermut iloriusissiorinissaannik suliakkerneqassasut. Piginnittuunermut iloriusissani siunnersuuteqartup kissaatigaa nalunaarasuartaateqarnermut tunngassu-teqartuni namminersortunngorsaanissaq, nalunaarasuartaateqarnermut tunngassu-teqartuni atortulersuutitut aningaasaliinissat taamatullu nuna tamakkerlugu sullissinerup qanoq issusia, najugaqarfiiit mikinerusut niuernermit tunngaveqarluni atugassarititaasut malillugit pilersor-neqarsinnaanngitsut immikkut eqqarsaatigalugit, isummerfigineqassasut.

Namminersortunut ingerlatassanngortitsiartuaarnissaq

Namminersortunngorsaanermik taaneqartartumut namminersortunngortitsinissamillu aalaja-ngiineroreersunut tunngavigineqartut Nalunaarasuartaatitigut atassuteqarneq nalunaarasuar-taatitigullu kiffartuussinerit pillugit Inatsisartut peqqussutaat nr. 17, 20. november 2006-imeersumi takuneqarsinnaapput, tassani nalunaarasuartaatitigut kiffartuussinerit namminer-sortunngorsarnissaannut tunngavissat aalajangersarneqarsimammata.

Inuiaqatigiit eqqarsaatigalugit suliassaqarfimmik pingaaruteqarlunnartumik nalunaarasuartaateqarnermut tunngasumik namminersortunngorsaanissaq pillugu eqqarsaatersornermi pingaa-ruteqarpoq paasisimasaniq eqqarsaatigilluakkanillu tunngaveqarluni aalajangiisoqartarnissaa. Taamaammatt inuiaqatigiit aningaasaqarnerannut sunniutaasinnaasut naliliisarluni misissorneqartariaqarput, namminersortunut ingerlatassanngortitsinikkut iluaqutaasussat

ajoqutaasussallu ersersillugit. Tunngavissat suliarineqarput 2016-imilu naammassineqarsimanissaat naatsorsuutigineqarluni.

Taamatut tunngavissiisoqareertinnagu nalunaarasuartaateqarnermut tunngassuteqartuni suli annerusumik namminersortunngorsaa sinnaaneq pillugu suut aqputigineqarnissaannik kissaateqarnerluta aalajangiisariaqanngikkallarpugut.

Naalackersuisut eqqarsaatersuutit aalajangiinissamut tunngavilersuutigineqartut aamma Naalackersuisut nalunaarasuartaateqarnermi niuernerup namminersortunngorsarneqarnissaanik apeqqummut isumaasa akornanni tunngaviusumik akerleriinnerusinnaasunik malugisaqanngillat. Ineqarnermut, Sanaartornermut Attaveqarnermullu Naalackersuisumit siornatigut nalunaarutigineqareersutut Naalackersuisut kissaatigaat namminersortunngorsaanissamik eqqarsaatersuutit kissaatigineqanngitsunik kinguneqarsinnaanerinit taamatuttaarlu annertuunik aningaasartuuteqarsinnaanermit sillimasariaqaratta, peqatigitillugulu qulakkeertariaqaratsigu inuiaqatigiit suli annertunerusumik namminersortunngorsaanikkut pissarsissutaasinnaasunik iluaquserneqarnis-saat. Naggataatigut inuiaqatigiinnut akisuallaalissaaq pissusissaatut paasineqarsimasunik tunngavissaqarani namminersortunut ingerlatassanngortitsineq nukingiuuneqalissagalarpat.

Siunissami inuiaqatigiinnut atortulersuutinit aningaasaliisarnissat

Nalunaarasuartaateqarnermut tunngassuteqartuni ineriartorneq tapersorsorneqassappat pingaaruteqarpoq atortulersuutinit aningaasaliisoqarnissaa. Ullutsinnut malinnaasariaqarpugut teknologii milu nutaanik pilersorneratigut periarfissaalersartut iluaqutigisarlugit. Ilaatigut pisutigalugu nalunaarasuartaateqarnerup annertunerujartuinnartumik nunami sumi nunassissimaneq apeqqutaatinnagu innuttaasut ataqatigiissittarmagit. Ilaatigullu ullutsinnut naleqquttunik inuiaqatigiinnut atortulersuuteqarnissaaq pisariaqartitaammat oqartussaasut namminersortullu sullissinerup qaffasissusiata ingerlaannarnissaanut aningaasaqarnikkullu ineriartornerup pilersinneqarnissaanut pitsaasunik periarfissaqarsinnaaqullugit.

Nalunaarasuartaateqarnermut tunngassuteqartuni pingaarnerusutigut atortulersuutit Tele Greenland-imit pigineqarput ingerlanneqarlutillu. Taamaammalluuna Tele Greenland atortulersuutinit aningaasaliisartuujuannarsimasooq. Naalackersuisut pilersaaruteqanngillat nalunaarasuartaateqarnermut tunngasuni nuna tamakkerlugu tamakkiisumik sianiginiagassat aalajangiisarnitsinnut aalajangiisuusarnissaannik tunngaveqarneq taamatullu tamakkununga tunngasuni kisermaassinissamut ilusiliussap nalunaarasuartaateqarneq pillugu peqqussummi allassimasunik tunngaveqartuaannarnissaa allanngortissallugit. Taamaammalluuna pilersaarutigineqanngitsoq Tele Greenlandip unammillerneqarani suliffeqarfittut atortulersuutinit niuernerpalaartumik tunngaveqarluni piginnittussaananeramik ingerlatsisussaananerani tunngaveqarneq allanngortissallugu.

Piginnittut iloriusissaat

Pingaaruteqarpoq ingerlatseqatigiiffinnut Namminersorlutik Oqartussanit pigineqartunut ingerlatseqatigiiffinni ataasiakkaani ineriartornerup siunnerfilimmik erseqqissumillu aquanne-

qarnissaa. Piginnittut iloriusissaat tamanna eqqarsaatigalugu taamatut aqutsinissap anguneqarnissaanut iloriusissaqarnermut atorneqassapput. Kisiannili Naalackersuisut isumaqarput piginnittut iloriusissaat tamakkununga tunngassuteqartunik ineriartortitsinermit pingaarnertut naalackersuinikkut anguniagassat aalajangersarneqarnissaannut atussallugit naleqquttuunngitsut. Taamaammat Tele Greenlandimut piginnittut iloriusissaat nalunaarasuartaateqarnermut tunngassuteqartuni naalackersuinikkut ineriartornermut aalajangiisuusariaqanngillat, soorluttaaq Royal Greenlandimut piginnittut iloriusissaat aalisarnermut tunngasunik naalackersuinermit tunngatillugu aalajangiisuusussaannngitsut.

Maannakkut ingerlaaseq ingerlasoq, nalunaarasuartaateqarnermut tunngasunik namminersortunngorsaanissaq eqqarsaatersuutigineqarluni suliarineqarlunilu, Nalunaarasuartaateqarnermut peqqussummik Inatsisartut 2006-imi akuersissutigisaannik pissusissaatut ingerlatitseqqinneruinnarpoq. Naalackersuisut allanngoriartorneq malinnaavigeqqissaarniarpaat aamma nalunaarasuartaateqarnermut tunngasuni kisermaassilluni ingerlatsinissamut piumasaaqatinik allanngortitsisoqarnissaanik siunnersuutinik takkuttoqassappat nuna tamakkerlugu tamakkiisumik isiginninnissamik sianiginiagassat puigornagit pingaarnarpaatut eqqaamaniarneqassapput.

Taamaammat Naalackersuisut siunnersuuteqartoq isumaqatigaat oqarmat namminersortunngorsaanermit, pilersuisussaataitanermit aamma siunissami aningaasaliissutaasartussat aningaasaliivigineqartarnerannut tunngatillugu inuiaqatigiinnut tunngatillugu tamakkiisumik isiginninniartoqartassasoq.

Taamatuttaarmi pingaartillugu anguniagaavoq Tele Greenlandimut ingerlatseqatigiiffinnut Namminersorlutik Oqartussanit pigineqartutulli allatut piginnittut iloriusissaannik suliaqartoqarnissaa. Taamaakkaluortoq Naalackersuisut isumaqarput suliffeqarfimmut pineqartumut piginnittut iloriusissaqarnissaat suliassaqarfimmi pineqartumi ineriartortitsinissamut pingaarnertut naalackersuinikkut anguniagassat aalajangersarnissaannut atussallugit naleqquttuunngitsut.

Tamakku tunngavilersuutigalugit Naalackersuisut aalajangiiffigisassatut siunnersuut saqqummiunneqarneratut iluseqartillugu akuersaarsinnaanngilaat Naalackersuisulli erseqqissassavaat naalackersuinermit tunngatillugu siunnersuuteqartup Naalackersuisullu isumaasa akornanni annertuunik akerleriittoqanngimmat.

Taamatut Naalackersuisunit oqaaseqarluta siunnersuummik saqqummiunneqartumik Inatsisartut suliarinninnissaat qilanaaraarput.